



3414-15-2-2-201903251702



N 15-2/3414
25/03/2019

საქართველოს გენერალურ პროკურორს
ბატონ შალვა თადუმაძეს

წინადადება

საქართველოს პროკურატურის თანამშრომლის მიერ მოქალაქე დ. [REDACTED] მ. [REDACTED]
გადაადგილების თავისუფლების უფლების უსაფუძვლოდ შეზღუდვის თაობაზე

შემუშავებულია საქართველოს სახალხო დამცველის აპარატის მიერ განხორციელებული შემოწმების შედეგების მიხედვით და გეგზავნებათ „საქართველოს სახალხო დამცველის შესახებ“ საქართველოს ორგანული კანონის 21-ე მუხლის „დ“ ქვეპუნქტის შესაბამისად.

ბატონო შალვა,

2018 წლის 22 მაისს საქართველოს სახალხო დამცველს N7766/18 განცხადებით მიმართა მოქალაქე დ. [REDACTED] მ. [REDACTED] (პ/ნ: [REDACTED] 0). განმცხადებლის განმარტებით, 2018 წლის 30 მარტს სარფის სასაზღვრო-გამშვებ პუნქტზე შეაყოვნა საზღვრის დაცვის თანამშრომელმა, შემდეგ კი ტელეფონით გაასაუბრა გამომძიებელთან. განმცხადებელი ასევე განმარტავს, რომ 2018 წლის 31 მარტს გამოიკითხა სისხლის სამართლის საქმესთან დაკავშირებით და მასთან ჩატარდა სხვა საგამომძიებლო მოქმედებები. განმცხადებელი ასევე განმარტავს, რომ მას გამომძიებელმა უთხრა, რომ არ გადაეკვეთა საქართველოს სახელმწიფო საზღვარი და არ დაეტოვებინა საქართველოს

ტერიტორია. თუმცა, განმცხადებლის მტკიცებით, მისთვის გაურკვეველია, თუ რა საფუძვლით აეკრძალა გამომძიებლის მიერ საქართველოს სახელმწიფო საზღვრის გადაკვეთა.

ამასთან, 2018 წლის 27 ივნისის საქართველოს მთავარი პროკურატურის N13/48426 წერილით საქართველოს სახალხო დამცველის აპარატს ეცნობა, რომ საქართველოს შინაგან საქმეთა სამინისტროს ქ.თბილისის პოლიციის დეპარტამენტის დეტექტივების სამმართველოს პირველი განყოფილების წარმოებაში არსებულ სისხლის სამართლის N010070218001 საქმეზე მოქალაქე დ. [REDACTED] მ. [REDACTED] გამოიკითხა მოწმის სახით. მის მიმართ სისხლისსამართლებრივი დევნა არ დაწყებულა და ასევე, არ დაწესებულა რაიმე სახის შეზღუდვა მისთვის საქართველოს საზღვრის კვეთასთან დაკავშირებით.

ხოლო 2018 წლის 24 სექტემბრის საქართველოს შინაგან საქმეთა სამინისტროს NMIA 9 18 02327803 წერილით საქართველოს სახალხო დამცველის აპარატს ეცნობა, რომ სისხლის სამართლის N010070218001 საქმეზე მოწმის სახით დაბარებულ იქნა დ. [REDACTED] მ. [REDACTED], რომელიც არ ცხადდებოდა საგამომძიებო ორგანოში, რის გამოც ზედამხედველი პროკურორის სიტყვიერი მითითების საფუძველზე იგი საზღვარზე დაყენებულ იქნა ოპერატიულ შეჩერება- შეტყობინებაზე. დ. [REDACTED] მ. [REDACTED] გამოცხადდა საგამომძიებო ორგანოში, სადაც იგი მოწმის სახით იქნა გამოიკითხული და შემდგომი კვლევისთვის აღებულ იქნა ნერწყვის ნიმუში, რომელზეც დანიშნულ იქნა ბიოლოგიური ექსპერტიზა.

2018 წლის 03 დეკემბერს და 2019 წლის 22 იანვარს საქართველოს სახალხო დამცველის აპარატმა N15-2/14917 და N15-2/794 წერილებით მიმართა საქართველოს შინაგან საქმეთა სამინისტროს, წარმოედგინათ ინფორმაცია, რომელი ნორმატიული აქტის საფუძველზე მოხდა მოქალაქე დ. [REDACTED] მ. [REDACTED] დაყენება საზღვარზე ოპერატიულ შეჩერება-შეტყობინებაზე სისხლის სამართლის საქმეზე ზედამხედველი პროკურორის სიტყვიერი მითითების საფუძველზე. აღნიშნული წერილების საფუძველზე საქართველოს შინაგან საქმეთა სამინისტროს საქართველოს სახალხო დამცველის აპარატისთვის რაიმე სახის ინფორმაცია არ მიუწოდებია.

ვინაიდან საქართველოს მოქმედი კანონმდებლობა საქართველოს მოქალაქის მიმართ მიმოსვლის თავისუფლების შეზღუდვის შესაძლებლობას ითვალისწინებს მხოლოდ პირის მიმართ სისხლისსამართლებრივი დევნის დაწყების შემდეგ¹ ან იმ შემთხვევაში, თუ მოქალაქე სასაზღვრო-გამშვებ პუნქტზე წარადგენს ყალბ ან ძალის არმქონე საბუთებს,² შესაძლოა სისხლის სამართლის N010070218001 საქმეზე საპროცესო ხელმძღვანელობის განმარტაციული პროკურორის მხრიდან ადგილი ჰქონდეს საქართველოს მოქალაქის გადაადგილების თავისუფლების უკანონო შეზღუდვას და საქართველოს შინაგან საქმეთა სამინისტროს თანამშრომლისათვის უკანონო სიტყვიერი მითითების მიცემას მოქალაქისთვის უფლების შეზღუდვის შესახებ.

ზემოაღნიშნულიდან გამომდინარე, ვინაიდან საქართველოს პროკურატურის მუშაკის მიერ შესაძლოა ადგილი ჰქონდა მოქალაქე დ. [REDACTED] მ. [REDACTED] (პ/ნ: [REDACTED]) უფლებების შესაძლო დარღვევას, „საქართველოს სახალხო დამცველის შესახებ“ საქართველოს ორგანული კანონის 21-ე მუხლის „დ“ ქვეპუნქტის თანახმად, მოგმართავთ წინადადებით დაიწყოთ სამსახურებრივი შემოწმება საქართველოს პროკურატურის მუშაკის მიერ სამსახურებრივი უფლებამოსილების შესაძლო არაჯეროვანი შესრულებისა და მოქალაქე დ. [REDACTED] მ. [REDACTED] (პ/ნ:

¹ საქართველოს სისხლის სამართლის საპროცესო კოდექსის 163-ე მუხლი.

² საქართველოს კანონის „საქართველოს მოქალაქეების საქართველოდან გასვლისა და საქართველოში შემოსვლის წესების შესახებ“ მე-10 მუხლი.

██████████) უფლებების შესაძლო დარღვევის თაობაზე და გიგზავნით საქართველოს სახალხო დამცველის აპარატში არსებული შესაბამისი მასალების ასლებს.

განხილვის შედეგების შესახებ, გთხოვთ, გვაცნობოთ ამავე კანონით დადგენილ ვადაში.

დანართი: 9 (ცხრა) ფურცელი.

პატივისცემით,

ნინო ლომჯარია

სახალხო დამცველი

წ- 

